

բնոյթ կրող բոլոր կարեւոր հարցերում Ազգային Խորհուրդը և Արեւմտահայ Բիւրօն գործում էին համախոհ ու համերաշխ, մանաւանդ, ճակատի պաշտպանութեան գործում*) :

Ռազմաճակատի դրութիւնը երթալով՝ բարդանում ու ծանրանում էր : Թիկունքում, երկրի զանազան կողմերում զարգանում և ամրանում էին կենտրոնախոյս ուժերը, որոնք ձգտում էին արտաքին պատերազմը վերածել ներքին՝ քաղաքացիական կռիւ : Այս աշխատանքը աւելի սաստկացաւ, մանաւանդ, Լենինի և ընկերների, Գերմանիայի վրայով, Ռուսաստան հասնելուց յետոյ : Բոլշեւիկները յայտնապէս աշխատում էին քայքայել ռազմաճակատը և թիկունքի պաշտպանութեան գործը : Յոգնած ժողովուրդին ուղղելով հրապուրիչ խօսքեր ու դայթակղեցնող խոստումներ, անսանձ խուժանաւարութեամբ ու միջոցների մէջ խտրութիւն չդնող գործելակերպով՝ նրանք յաջողում էին իրենց կողմը քաշել պատերազմից զուրկ ու պարէնի նեղութիւն կրող տգէտ զանգւածները և նրանց միջոցով պայքարել կառավարութեան դէմ : Բոլշեւիկների ձեռքին մասնաւորապէս սուր զէնք էր անջատ հաշտութեան և ազգային ինքնորոշման պահանջը : Ի զուր Բան. և Զինւ. Խորհրդում Ծերեթեւեռներ էր թափում համոզելու, որ «անջատ հաշտութիւնը» ո՛չ միայն ցանկալի չէ, այլ և անիրագործելի է, որովհետեւ, այդ դէպքում, ռուսական յեղափոխութիւնը հարկադրւած կը լինի անյապաղ նոր պատերազմի ելնել այս անգամ արդէն գերմանական կօայլցիային պատկանող երկրների կողմը : Ի զուր Քերենսկին հակաճառում էր յանուն ազգերի ինքնորոշման սկզբունքի խուժանաւարօրէն թիւրքահայաստանի պարզումը պահանջող Լենինին, թէ՛ «Մենք չենք կարող պարպել Հայաստանը, որովհետեւ այդ դէպքում Հայաստանից ոչինչ չի մնայ. նա կը կորչի քիւրդերի և թիւրքերի դանակների տակ» . — ամբոխային հոգեբանութիւնը կատարում էր իր քայքայիչ գործը : Եւ անգամ հայերի մէջ գտնուում էին մարդիկ, որոնք ծառանում էին Քերենսկիի այնքա՛ն բնական ու մարդկային յայտարարութեան դէմ . «Սա չափազանց վնասակար յայտարարութիւն է հայ ժողովուրդի շահերի տեսակէտից, դրում էր Թիֆլիսի «Պայքար» թերթը (սոց. դեմ.) : Այս յայտարարութիւնը չի համապատասխանում դեմոկրատիայի իրական քաղաքականութեան և չափազանց վնասակար է հայ ժողովուրդի շահերի տեսակէտից : Կրկին զօրքին, բազմաչարչար բանւորութեանն ու գիւղացիութեան յայտարարում են, որ նրանք չարունակեն ապրել դժոխային պայմաններում հայքի համար» : Եւ Ռուսաստանի բոլշեւիկների հետ միասին՝ հայ սոցիալ-դեմոկրատներն էլ գերադասում էին վարել մի քաղաքականութիւն, որ հայ ժողովուրդը ապրի դժոխային պայմաններում, միայն թէ ռուս «բազմաչարչար բանւորութիւնն ու գիւղացիութիւնը» պատճառ չունենայ դժգոհ լինելու :

Սակայն, քանի ժամանակն անցնում էր, այնքան կառավարութեան համար դառնում էր դժուար երկրում աճող անիշխանութեան, պարենաւորման

*) Ազգային Համագումարի և Ազգային Խորհրդի մասին աւելի մանրամասն տեղեկութիւններ կարելի է գտնել Հ. Յ. Դ. Փարիզի Շրջ. Կոմիտէի հրատարակած «Մայիս 28», Փարիզ, 1926թ. գրքում :